

Završen projekat reforme registracije poslovnih subjekata u BiH

Registracija firme za pet dana

Prezentovan
novi sistem
registracije firmi



FOTO S. P. N. J. A. G. I. C.

Maja RENER

SARAJEVO - Registracija preduzeća u BiH od naredne sedmice trajaće pet dana, što je omogućeno četverogodišnjim projektom reforme registracije poslovnih subjekata u BiH, koji je sa 2,7 miliona KM finansirao Ured za međunarodni razvoj Vlade Velike Britanije.

Mctju Rajkroft, britanski ambasador u BiH, juče je u Sarajevu, na prezentaciji novog sistema registracije preduzeća, istakao da će ovaj petodnevni proces obuhvatiti i dobijanje poreskog identifikacijskog broja.

"BiH je na 95. mjestu po lakoći poslovanja od 175 zemalja. U FBiH su u prosjeku potrebna 44, a u RS 32 dana za registraciju preduzeća. Od iduće sedmice taj proces u 16 specificiranih sudova u BiH trajaće pet dana. Rješenje o registraciji biće jednoobrazno za cijelu BiH, a podaci o registrova-

nim firmama biće dostupni u elektronskoj formi svim relevantnim institucijama", kazao je Rajkroft.

Dodao je da je cilj novog sistema registracije da bh. građanima olakša put od poslovne ideje do njene realizacije, te otvaranje novih radnih mjesta.

"Reforma sistema registracije

bila je jedna od 16 ključnih područja u kojima je BiH trebala napraviti hitne reforme kako bi napredovala na putu integracija", naglasio je Rajkroft.

Anton Kasipović, potpredsjednik Vlade RS, rekao je da je ovo još jedan dobar dan za BiH, dodavši da će sada fiktivne firme biti fikcija.

"Važno je što će korekcija prijave registracije biti moguća u rukopisu. Administracija počinje poštovati svog građanina", kazao je Kasipović.

Kristijan Švarc-Šiling, visoki predstavnik u BiH, tvrdi da je glomazna birokratija i nepotrebna papirologija bio jedan od najvećih problema bh. privrednika, te da će novi sistem registracije ovo promijeniti.

Ministar pravde FBiH Feliks Vidović rekao je da je projekat veliki dobitak za BiH, dok Goran Salihović, predsjednik Općinskog suda Sarajeva, smatra da će BiH ovim imati sigurnije pravosude i investicije.

U britanskoj ambasadi

napomenuli su da sudsko osoblje podliježe kazni ako odbijenica prijave nije pravno obrazložena. Objasnili su da je za registraciju, osim prijave, potrebno dostaviti isprave čiji se spisak može dobiti u sudu. Prijava je besplatna, a nalazi se i na internet stranici www.bizreg.ba i može biti podnesena bilo kojem sudu za registraciju.

"Za registraciju firme do sada u FBiH bila potrebna 44, a u RS 32 dana"